

प्रादेशिक समाचार

- देशभर मांय जीएसटी री नुवी दरां आज सूं लागू-आम उपभोक्ता, व्यापारियां अर उद्यम संगठणां मांय उच्छाव रो माहौल ।
- जीएसटी बचत उत्सव री आज सूं सरूआत-29 सितम्बर ताई न्यारी न्यारी जागरुकता गतिविधियां राखी जावेला ।
- सेवा पर्व रे तैत प्रदेशभर मांय केई कार्यक्रम-प्रधानमंत्री नरेन्द्र मोदी रा जीवन माथे आधारित फिल्म दर्शकां खातर सीख देवण वाळी बणी ।
- शक्ति पर्व नवरात्र रा पहला दिन आज घरां अर मिन्दरां मांय घट स्थापना-अग्रसेन जयंती माथे भी केई कार्यक्रम राख्या गया ।

000

देशभर मांय आवती पीढी रा जीएसटी सुधार आज सूं लागू व्हे ग्या है । नुवा कर ढांचा रे तैत, जीएसटी परिषद लारला दिनां अप्रत्यक्ष कर प्रणाली ने 5, 12, 18 अर 28 फीसदी री चार-स्लैब्स सूं सरल बणा र 5 अर 18 फीसदी री दो-स्लैब्स मांय बदल दियो है । जीएसटी सुधारां मांय सरकार न्यारा न्यारा हलकां रा करां मांय बड़ी कटौती कर आम आदमी ने राहत दी है । जीएसटी मांय कटौती सूं आम लोग, खासकर मध्यम वर्ग माथे माळी बोझ कम व्हेला अर इण सूं वां री बचत मांय इजाफो व्हेला । इण बीच नुवी जीएसटी दर रा पहला दिन आज जयपुर समेत प्रदेशभर रा बाजारां मांय खासी रौनक दिखाई दी । लोग आपरी जरूरत रा घरेलू अर इलेक्ट्रोनिक उत्पादां रे सागे गाड़ियां खरीदता नजर आया । उद्यम संगठन अर व्यापारी वर्ग भी सरकार री इण पहल सूं खासी उत्साहित है ।

000

जीएसटी री नई स्लैब रे सागे ही आज सूं देशभर मांय जीएसटी बचत उत्सव री भी सरूआत व्ही । 29 सितम्बर ताई चालबा वाळा इण उत्सव रो लगस जीएसटी दरां मांय कटौती रो फायदो आम उपभोक्ता ताई पूगाबा रे सागे व्यवसायी वर्ग ने प्रेरित करणो है । जीएसटी विभाग री कानी ऊं व्यापारियां ने नई दरां री जाणकारी देबा खातर कार्यक्रम राख्या गया है । झुंझुनूं मांय जिला प्रशासन री कानी ऊं सेमीनार राखी गई । इण मांय व्यापारिक संगठन, सीए अर उद्यमी भाग लीना । राज्य जीएसटी रा संयुक्त आयुक्त उमेश जालान बतायो के महकमो नई दरां रो फायदो उपभोक्तावां ताई पूगाबा खातर प्रतिबद्ध है ।

000

जयपुर रा सांगानेर मांय राख्या बचत उत्सव कार्यक्रम मांय मुख्यमंत्री भजनलाल शर्मा शिरकत करी । श्री शर्मा कारोबारियां सूं विकसित अर आत्मनिर्भर भारत खातर मिल र काम करबा री अरज करी ।

000

केन्द्र सरकार देश मांय पीएम उज्ज्वला योजना मांय 25 लाख नया पात्र परिवारां ने जोड़बा रो फैसलो कर्यो है । नवरात्रि रा पहला दिन सरकार कानी ऊं दिया गया इण उपहार माथे प्रधानमंत्री नरेन्द्र मोदी मातावां अर बहनां ने शुभकामनावां दी । एक सोशल मीडिया पोस्ट माथे प्रधानमंत्री कयो के सरकार रो ओ कदम इण पावन पर्व माथे नुवी खुशियां देवेला अर महिला सशक्तिकरण रा संकल्प ने भी मजबूत करेला ।

000

प्रदेशभर मांय चाल रह्या स्वस्थ नारी सशक्त परिवार अभियान रे तैत टोंक जिला रा मुड़िया गांव मांय मेगा हेल्थ केम्प राख्यो गयो । मुख्य चिकित्सा अधिकारी डॉ शैलेन्द्र सिंह चौधरी बताया के इण रे तैत महिलावां ने मजबूत बणाबा, मासिक धर्म स्वच्छता, पोषण ने बढ़ावो

देबा अर गैर संचारी रोग, एनिमिया, टीबी, टीकाकरण, प्रसव पैली री जांच समेत मां अर टाबर रा स्वास्थ्य ने प्रोत्साहन देबा रा मकसद सूं महिलावां ने जागरूक कर्यो गयो। इण दौरान ग्रामीण महिलावां रा स्वास्थ्य री जांच कर जरूरी सुझाव दिया गया। इण रे सागे ही मुख्यमंत्री आयुष्मान आरोग्य योजना रा रजिस्ट्रेशन, आयुष्मान कार्ड अर एमसीपी कार्ड सरीखी सेवावां भी मुहैया करवाई गई।

000

प्रधानमंत्री नरेन्द्र मोदी रा जन्मदिवस रे मौके सरू व्हीया सेवा पर्व रे तैत आज भी केई गतिविधियां राखी गई। मुख्यमंत्री भजनलाल शर्मा आपरा रेहवास माथे पौधा लगा र पर्यावरण ने बचावण रो संदेश दियो। वणा आमजन सूं भी एक पेड़ मां के नाम अभियान सूं जुड़र बत्ता ऊं बत्ता पौधा लगाबा री अरज करी। श्री शर्मा कया के सेवा पखवाड़ा रे तैत चलाया जा रह्या शहरी अर ग्रामीण सेवा शिविरां मांय आमजन ने तुरत सुविधावां अर सेवा देबा खातर सरकार प्रतिबद्ध है। मुख्यमंत्री कया के आखिरी छोर रा व्यक्ति तांई सरकार री जनकल्याणकारी योजनावां रो फायदो पूगाणो तैय कर्यो जा रह्यो है।

000

प्रधानमंत्री नरेन्द्र मोदी रा जीवन माथे आधारित “चलो जीते हैं” फिल्म रो प्रदर्शन देशभर रा 500 सिनेमाघरां अर शिक्षण संस्थानां मांय कर्यो जा रह्यो है। प्रदेश री 56 स्क्रीनां माथे भी इण प्रेरणादायी फिल्म रो दरसाव कर्यो जा रह्यो है। लोग इण ने उच्छाव सूं भरी फिल्म बता रिया है। उदयपुर रा एक दर्शक डॉ. ओम प्रकाश फिल्म देखबा रे पाछे आपरी राय जाहिर करी।

000

शक्ति पर्व शारदीय नवरात्र री आज सूं सरूआत व्ही।

000

इण बगत एक तिथि बढबा सूं नवरात्र नौ री ठोर दस दिन चालेला। नवरात्र रा पैला दिन मां शैलपुत्री री विधिवत पूजा-अर्चना करी गई। इस सूं पैली घरां अर मिन्दरां मांय शुभ मुहुर्त मांय घट स्थापना करी गई। हवन यज्ञ रे सागे न्यारा न्यारा देवी मिन्दरां मांय संवारे सूं ही भक्त देवी रा दर्शन खातर पूग रह्या है। अमेर रा शिलामाता, देशनोक रा करणी माता मंदिर, करौली रा कैलादेवी मिन्दर रे सागे सगळा छोटा-मोटा दुर्गा मंदिर अर शक्तिपीठां मांय खास अनुष्ठान कर्या गया। जैसलमेर मांय भारत-पाक सरहद रे कने रा तनोट माता मिन्दर मांय आमजन रे सागे बीएसएफ रा जवान माता रे ढोक लगा र सुख-समृद्धि री कामना करी।

000

म्हाका करौली खबरनवीस बताया के खास शक्तिपीठ कैलादेवी मांय घट स्थापना रे सागे ही आज सूं मेळा री सरूआत व्ही।

000

महाराजा अग्रसेन री जयंती आज धार्मिक उच्छाव रे सागे मनाई जा रही है। इण मौके प्रधानमंत्री नरेन्द्र मोदी आपरा संदेश मांय कया के महाराज अग्रसेन रो पूरो जीवन सामाजिक न्याय अर एकता रो प्रतीक है। प्रधानमंत्री सोशल मीडिया पोस्ट मांय कया के वां रो सद्भाव अर आपसी भाईचारा रो संदेश देशवासियां ने हमेशा प्रेरित करतो रेवेला। अग्रसेन जयंती रे मौके प्रदेशभर मांय केई कार्यक्रम राख्या गया। जयपुर मांय इण मौके अनुष्ठान अर सम्मान समारोह भी राख्या गया। शहर रा खास बाजारा सूं हो र महाराज अग्रसेन री रीति मुजब शोभायात्रा काढी जा री है। वठी ने सवाईमाधोपुर, भरतपुर, करौली अर चूरू समेत केई जिलां सूं भी अग्रसेन जयंती मनाया जाबा रा समाचार है।

000

कोटा जिला मांय खातौली रे कने पार्वती नदी मांय पिकनिक मनाती टेम नहाबा गया चार मोट्यार पाणी रा तेज बहाव मांय डूब गया। पुलिस उपाधीक्षक शिवम जोशी बताया के एसडीआरएफ अर गोताखोरां री मदद सूं तलाश अभियान जारी है। इण मांय सूं एक मोट्यार रो शव काढ लीनो है, जदके दूजा री तलाश जारी है।

000

प्रधानमंत्री नरेन्द्र मोदी 28 सितम्बर ने आकाशवाणी रा मन की बात कार्यक्रम मांय आपरा विचार साझा करेला। या इण मासिक कार्यक्रम री 126वीं कड़ी व्हेला। इण खातर सुझाव टोल-फ्री नंबर 1800-11-7800 माथे भेज्या जा सके है। नरेन्द्र मोदी एप अर माय जीओवी ओपन फोरम रे मार्फत भी विचार भेज्या जा सके है। ये सुझाव 26 सितम्बर ताई मान्य कर्या जावेला।

000

संसदीय कार्य मंत्री जोगाराम पटेल आज जोधपुर रा लूणी मांय काश्तकारां सूं बातचीत कर जीएसटी माथे चर्चा करी। श्री पटेल नेक्स्ट जनरेशन जीएसटी रिफॉर्म माथे गांव वाळा रा सवालां रा जवाब दिया अर कया के खेतीबाडी अर ग्रामीण अर्थव्यवस्था ने इण सूं फायदो मिलेला। संसदीय कार्य मंत्री बताया के 1800 सीसी ताई रा ट्रैक्टर री खरीद माथे अबे 5 फीसदी ही जीएसटी लागेला। इण रे इतर खेतीबाडी अर डेयरी हलका रा उत्पादां माथे भी जीएसटी री नई दरां रो फायदो मिलेला।

000